

simonium corpora sua holocausta roborant, ut in Dei Domum, idest in Cœlestis Domicilii habitationem hospitiarum suarum sacrificiis introirent. Denique scribit, generosos illos Christi Athletas per passionum pœnas & mortes in Locum Beatitudinis transire. En quid Requies, quid Refrigerium fuerit beato Hilario.

Quamobrem basilice fallitur Burnetus, quum Hilarium in suæ opinionis præsidium adventurum sperat. Habemus Sanctum virum disertissime non uno in loco affirmantem, minime expectandam Justis postremi Judicii diem; ut ad beatam in Cœlis vitam affurgant. Urgentem tamen aliquem post Burnetum audire mihi videor, atque Hilarii verba repetentem ex Tractat. in Psalm.cxx.ubi de Justis inquit: *Exeuntes de Corpore, ad introitum Regni Cœlestis per Custodiam Fideles omnes referabuntur, in Sinu Scilicet interim Abrabæ collocati.* Ergo nondum Justus (dicit aliquis Burnetus) immo ne Apostoli quidem, neque Martyres (inquit enim Hilarius *Fideles Omnes*) ad *Regnum Cœlorum* conscenderunt, ac proinde Visionem Dei adhuc desiderant, non tenent. Sed amovebit & hunc obicem Hilarius ipse. Duplex *Regnum* jamdiu animadverterunt Eruditi a Sancto Hilario excogitatum: unum *Christi*, alterum *Dei*. Primum constituitur a duplici mystica Civitate Hierosolyma, nempe ab Ecclesia militante in terris, atque a triumphante in Cœlis Christus nempe regnat in Sanctis super terra viventibus, & ex hisce efformat sensim Cœlestem Civitatem, de qua Apostolus ad Hebr. xii. 22. *Accessistis ad Sion Montem, & Civitatem Dei viventis, Hierusalem Cœlestem, & multorum millium Angelorum frequentiam & Ecclesiam primitivorum, qui conscripti sunt in Cœlis, & Spiritus Justorum perfectorum.* Hæc *Regnum Christi* est, quippe ex Animabus conflata, quas ipse suo sanguine, veluti Populum acquisitionis, sibi comparavit. Descendit enim de Cœlo Filius Dei accipere *Sibi Regnum*, ut ipse testatus est Luc. xix. 12. Postquam vero Apostolus prima ad Corinth. xv. 23. Resurrectionem mortuorum deprædicavit, hæc addidit: *Deinde finis, quum (Christus) tradiderit Regnum Deo & Patri, quum evacuaverit omnem Principatum &c.* Itaque tunc secundum Hilarii mentem exordium erit *Regno Dei*: & quod antea *Regnum Christi* appellabatur, incipiet nuncupari *Regnum Dei, Regnum Cœleste, Regnum Æternum*, quia consummatæ perfectæque Beatitudinis apicem Justorum Animæ una cum recepto Corpore attingent. Hilarium ipsum audi in Psalm. cxlviii. num. 8. *Regnat itaque Dominus (en Regnum Christi duraturum usque ad Resurrectionem omnium) traditurus Deo Patri Regnum (nempe post univèrsale Judicium, ubi diciturus est Justis: Possidete paratum vobis Regnum) non Regni potestate cariturus, nam Regni ejus etiam post Resurrectionem non erit finis.* At in quo situm est Christi Regnum? Pergit dicere Hilarius: *Sed Nos qui Regnum ejus sumus, Deo Patri traditurus in Regnum. Regni traditio nostra protractio est. Quam ergo Hilarius ait, interim Fideles Omnes ad introitum Regni Cœlestis per Custodiam Domini*